


# „Bernia”

## ek

# „Burnia”

## neamd,



# biwenne troch Abe Mulder

## Pleatsen yn 'e Bird by Grou

Doe't ik op myn reis troch de Bird dizze pleats foarby fytste, bleau foar my de tiid efkes stilstein of noch better sein, roun 50 jier tobek. Ik moast tinke oan in tiid dy't hast noch foar myn feintjeieren lei. Yn dy tiid wie it wenst dat yn de neisimmer de boeredochters har freondinnen in middei op bisite kriegen en dan jouns nei melken troch de boeresoannen, meastaal bruorren en in inkelde dy't forkearing hie, har feint, wer ophelle waerden en nei hûs brocht.

Ik seach dêr noch de barten mei de draei oer de Bird lizzen, efkes fierder de wenarke fan de feste arbeider en dan de stjelphuzinge dêr't de boer mei syn hûshâlding yn wenne.

Sa hie ik hjir ek wol ris west en hwat hiene wy dan in wille. Earst hwat thédrinken yn de wenkeamer, dan oan it dounsjen yn it milhûs. Dan foarmen him pearkes en waerden se stikum wei op it hiem om yn 'e ljochtmoeanne in kuijer troch it hôf to meitsjen. „Hwat in wille”, tocht ik, „tiid hwer bistû bleaun”. Mar de tiid hâldt gjin skoft, songen Tetman en Jarich, en sa wie it foar my ek. Ik wist nou net iens de namme fan de boer, dy't der wenne.

„Abe Mulder”, sa stelde hy him foar, doe't ik myn boadskip sein hie.

„Wy hiene Jo alris forwachte”, sa sei Mulder. „Nou 't Jo oer de pleatsen yn 'e Bird skriuwe, sille wy ek wol oan bod komme”.

It wie noch de stjelp sa't ik him kennen hie en yn 'e foarmuorre wie n stien mitsele mei it opskrift: „Eerste steen gelegd 20 juni 1904 door Gerrit en Betje Zantema”. Dat wie it myn bernetiid. Nou is de pleats noch eigen aan de famylje fan dizze Zantema's.

De pleats is 33 ha great en it lân leit om hûs hinne. Neist it jongfê wurde der plm. 45 melke kij hâlden. „Jo dogge noch net alles mei trekkers”, sei ik tsjin de hear Mulder, doe't ik in pear hynders yn it lân rinnen seach.

„Né”, sei hy. „Dat is ek in leaf-hawwerij fan my en hast noch mear fan myn âldste dochter, ús Jitske. Dy hâldt folle fan hynsteriden en al is se dan ek noch mar 16 jier, op hurdraverijen fan boerehynders hat se al ris in priis woun. Forline jier, ú.o. yn de Himirik in earste B-priis, de Tynje in twadde A-priis, Reahûs in earste B-priis en Ulesprong in earste A-priis. Koartlyn ha ik ek noch yn 'e kante lêzen, ik miende fan Beets, mei it iene hynder in earste en mei it oare hynder in twadde priis. Hwat sil Jitske, en har heit tink net minder, dy deis greatsk west ha.

Nou oer de pleats. Sa as ik al skreau wie de stjelp yn 1904 boud. Earder moat de huizinge oarsom stien ha, hwant efter de huizinge stiet noch in hok dat oan de foarmsjen lit dat it earder in boerekeamer west hat. Doe't ik mei de hear Mulder der om hinne roun liet hy my noch muorre ankers sjen út it jier 1603. Doe stie de pleats mei de foarein nei it easten, wylst hy nou nei it westen boud is.

Yn de flooreenkohieren fan Grou komt dizze pleats foar by nû. 66 en wurdt dan „Bernia” neamd, mar letter ek wol ris „Burnia”. Eekhof jout him oan as „Bernia”. Eigeners en biwenners ha west:

1640 Willem Willems cum Uxoris Sytze Geales weesbern.

1698 Sybe Sybes cum Uxoris tot Roordahuizum 10 einsen. Bysitter van Asperen 11 pounsmiet, Pytter Willems en Jan en Sybrich Doaitzes 12 pounsmiet, Lysbet Jacobs tot Grou 12 pounsmiet en Cornelis Lyk-

les tot Aldeboarn 10 pounsmiet eigner. Wytze Gerbens sil wol brûker west ha.

1708 Ald boargemaster Jacobus Recalfs eigener, Wytze Gerbens brûker.

1718-1728-1738 Dr. Frisius de greateste helte en Sybren van Asperen in oar part. Wytze Gerbens brûker.

1748 De heer Cornelius Franciscus Julius foar him en ek foar de erfgenamen fan Franciscus Frisius cum Uxor is samt Franciscus van Rinia eigener fan it hoarnleger mei 1 stim. Hjirby protestearre mefrou A. van Haersma-Camstra omdat har by erfenis bipaling de hiele sate mei hoarnleger en stimrjocht en letter út principiële akte fan skieding de heale stim tawezien wie, brûker Haite Yskes.

1758 De hear C. F. Frisius cum soc.  $\frac{1}{2}$  part en mefrou A. van Haersma, widd. Camstra  $\frac{1}{2}$  part eigner, brûker Haite Yskes.

1768 Majoar B. Nauta  $\frac{1}{2}$  part en vrouwe Van Camstra, berne van Haersma  $\frac{1}{2}$  part eigeners, Sipke Douwes brûker.

1778 As yn 1768.

1788 Boargemaster B. Nauta  $\frac{1}{2}$  part en lânsiktaris Van Sminia  $\frac{1}{2}$  part eigeners, Sipke Douwes brûker.

1798 A. J. v. Sminia eigener, Meine Pytters brûker.

1818 Selde eigener, Meine P. van der Woude brûker.

1828 Bernia van Beugel eigener, Sickele Jansma brûker.

1838 Selde eigener en brûker as yn 1828.

1848 Mr. Casper v. Beugel eigener, Seakele Jans Jansma brûker.

1858 As yn 1848.

Oant safier de floreen- en stimkohieren. Hwa't der nei 1858 wenne ha wit ik net, mar bigjin 1900 wenne Abe Zantema der, twadde houlik mei Wietske Beeksma, eigener en brûker. Opfolgers ha west Jan de Boer en Betje Zantema. Dérnei Hindrik de Boer en Nieske Beeksma, in suster fan Wietske Beeksma, dy 't yn 1921 nei Eekema forhuzen. Doe waerd Wybren Stelwagen hjir boer.

Yn 1939 wenje Gerke Hylkema en IJbeltje de Boer der. De lêste is in pakesizer fan Abe Zantema. Se ha der oant 1930 ta buorke, doe kaem Roel van der Wal der to wenjen. En fan 1957 ôf wenje Abe Mulder en Grietje Bos der. Gerke Hylkema is eigener.

Myn winsk foar de famylje Mulder is dat it har dêr goed gean mei en dat de dochter mei de hynders Japke en Geeske noch mannich priis winne sille.